



partii naleraq

UPA 2017/185-01

10-05-2017

Meeqqat inuusuttuaqqallu 18-t inorlugit ukiullit ikiaroonartumik atuilersimasut katsorsartinnissaannik immikkut ittumik neqeroorsinnaanissamik Naalackersuisut UKA2018-mut pilersaarusiornissaannik Inatsisartut aalajangiiffigisassaattut siunnersuut.

(Inatsisartunut ilaasortaq Bendt B. Kristiansen, Inuit Ataqatigiit)

Inatsisartunut ilaasortap Bendt B. Kristiansen, Inuit Ataqatigiinneersup siunnersuutaa Meeqqat inuusuttuaqqallu 18-t inorlugit ukiullit ikiaroonartumik atuilersimasut katsorsartinnissaannik immikkut ittumik neqeroorsinnaanissamik Naalackersuisut UKA2018-mut pilersaarusiornissaannik Inatsisartut aalajangiiffigisassaattut siunnersuut Partii Naleraq sinnerlugu imannak oqaaseqarfigissuarput:

Siullermik inatsisartunut ilaasortaq Bendt B. Kristiansen qujanaq siunnersuut pisariaqartorujussuaq oqaluuserisassanngortikkakku.

Tassami assortorneqarsinnaanngilaq nunatsinni ikiaroonartumik ajornartorsiuteqarnerput inersimasuinnaanngitsunut sinniuteqapiluttarmat. Aammali ajoraluartumik meerarpassuit inuusuttullu ajornartorsiummik tassanga atuilersimanngikkunik eqqungaasimasut misissuisarnertigut uppersineqarnikuupput.

Taamaattumik tamatta soqutigilluinnartariaqarparput meeqqat inuusuttuaqqallu ikiaroonartumik ajornartorsiuteqalersimasut piaartumik ikiorserneqarnissaat sulissutigissallugu.

Tassami pingaartumik meeqqat inuusuttuaqqallu ulloq unnuarlu paaqqinnittarfinnut akisoorujussuarmik aningaasartuuteqarfiusunut inissinneqartartut ikiaroonartumik aamma atuisarsimanerat annertusiartuinartutut oqaatigineqartoq akuersaarneqarsinnaanngilluinnarpoq.

Aamma taakua saniatigut meeqqat inuusuttuaqqallu 15-17-nut ukiullit 9 %-iisa ullut 30-it kingulliit iluanni ikiaroonartumik pujortarsimasut uppersineqarsimavoq, taamaattumik pisariaqarluinnarpoq piaarnerpaamik iliuuseqarnissaq.

Ungasissorsuunngitsumi Peqqissutsimut Naalackersuisut sinerissap ilaani angalaneranut atatillugu ataatsimiisitsinermi inuusuttut ilaat pinaveersaartitsinermut tunngatillugu eqqarsaatigineqartariaqarluinnartumik oqaaseqarpoq, pinaveersaartitsinermik ingerlatsineq allanngortinneqartariaqannginneroq, tassami assersuutigalugu oqaatingaa, meeraavugulli pinaveersaartitsinermik suliniartoqartoq, kisianni taamanersuarli pinaveersaartitsineq ingerlanneqaraluartoq, ajornartorsiutit amerlingaluttuinnarput !

Taamaammatt isumaqarnarpoq periutsit allat atorlugit ajornartorsiutiniq qaangiiniarneq paasititsiniaanerillu ingerlanneqartariaqartut.

Soorlu assersuutigalugu, soormi inuit ikiaroorartumik ajornartorsiuteqarsimasut, aninguisimasullu paasititsiniaanermi atornianngilangut ? Taakkuummatami ajornartorsiutiniq atuisimasut ilisimasaqarnerpaajusullu.

Taama oqaaseqarluta, siunnersuut tamakkiisumik taperserlugu ataatsimiititaliami susassaqartumi suliarineqarnissaa inassutingaarput.